

## **Ino Turakki Pablo Sino Filiposira**

### **Ino Mapeafu Sitawa Turak**

Iyawa turak, neturakki Pablo sino palunguwa pakkakarampattanino manguruwira a neyafuna sino probinsiya a Macedonia sey Europa (Inangwa 16:6-40). Sin neturakkanna yaw, nabalud gafu sino nangibanyanna sino nalawara damag mapeafu ki Afu Jesu Kristo.

Ino tata a gafuneno niturakkanna taw, ta passalamatanneno manguruwira sey Filipos sino duffuna nepaappara sikwana. Ana kappayino sinapi'na a mappaanggam sikwara anna mapattuyag sino angngurudda, tantaro nu malowino nakanda gafu sino nabaluranna andino kadidyata idamanda kappay.

Sinapasapi'na kappay sikwara si tuntulanda naddino aggangwa i Kristo sin nagyananna sito lubag ta dandamanda naddino pallawaranino bafulundera a bakkampelangino pallawaranda. Nepadandamma sikwara si mesalakanira gafu sino allakki Dios andino angngurudda ki Kristo, antuweno ammera nad talakkannino lintiyi Moises onnu ino aggangwa a kunnino tolayira a matuntul nad. Ana kappay sinapi'na sikwara mapeafu sino siyana'nga nakamma iya'da i Dios sino mikararira sino problemara sikwana, andino labuta iya'dana sino amminira a mangurug ki Kristo nanu mebulunira sikwana sey langit.

## **Ino Bagga'na Yaw**

Ino gafuneno turak 1:1-11

Ino akkakokwa i Pablo 1:12-26

Ino tuntulan naddino manguruwira 1:27-2:18

Ino mapeafu sikwara Timoteo anda Epafrodito 2:19-30

Ino naggabwatanino kinagaddangngi Pablo 3:1-11

Ino panuntulantam sino panggammani Dios 3:12-21

Ino tuldu mapeafu sino siyana'nga nakam 4:1-9

Ino nappasalamatani Pablo sino duffunino Filiposira 4:10-20

Ino ambu'nenno turak 4:21-23

### *Ino Gafuneno Turak*

<sup>1</sup> Ikkamira Pablo anni Timoteo a masserbi ki Kristo Jesus. Antuyawino tura'mi sikwayu ammin sitan Filipos a tolayi Dios gafu sino nesapatandaw ki Kristo Jesus, mampesino pangafuwandawira andino kaduffunandera. <sup>2</sup> Allakkandakayu naddi Dios a Amatam anni Afu Jesu Kristo, e passiyanakkanda naddino nakandaw.

### *Ino Karari Pablo Para Sino Filiposira*

<sup>3</sup> Kadda dandammantakayu, mappasalamatak ki Dios a passerbiyangku. <sup>4-5</sup> Se nangiyafu sin nanguruwandaw kiyad to ingkein, dinuduffunandak sino tarabafuka mangipakaammu sino nalawara damag. Antu gafuna, maangammakungke kadda ikararantakayu. <sup>6</sup> Mappasalamatak kappay

se ammu si itulutuluyi Dios ino nalawara akwana sino biyaddaw kiyad si mabalinino gakkanna para sikwayu naso awa puliyani Kristo Jesus. <sup>7</sup> Meannung si kunnenayino dandammangku mappeafu sikwayu, se iiddukantakayu. Se nesapakkayu sino allak anna duffuni Dios sikwak sin nangita'daggangku sino kakuruwanneno nalawara damag mappeafu ki Kristo, e kunna kappay sito nabalurangku. <sup>8</sup> Ammuwi Dios si maanappakungke sikwayu. Aangantakayungke a kunna payino agganggamm Kristo Jesus sikwayu.

<sup>9</sup> Kunyawawino ikararaggu ki Dios. Arangngangku si mattuyangngaddino agganggandaw sikwana andino bafulundawira, anna madadagganano ammuyu mappeafu sikwana andino pannakadamayuwa mimunu sino nalawara akwandaw <sup>10</sup> takesi damayuwa tuntulannino kalalawaran. Se nu kunnenoy, passiya nalawarino aggangwayu, e awaningke kabalawandaw naso awa puliyani Kristo. <sup>11</sup> Duffunandakayu kappayi Jesu Kristo ta odduweno nalawara maggabwat sino naggaddangnga akwandaw kesi medayawi Dios anna mepaiteno kinalawanna.

### *Ino Nalawara Tupa'ngeno Nabalurani Pablo*

<sup>12</sup> Kakkolak, anggangkuwa ipakaammu sikwayu si ammena narakkattino tupa'ngeno nabalurangku, nu ammena lud nalawad, se inoodduweno naningngag sino nalawara damag. <sup>13</sup> Se inammuwan amminino sindaluwera a mindag sino palasiyu andino korwanira a tolay

sitaw si awana korwana gafuneno nabalurangku nu bakkampelangino nasserbiyangku ki Kristo. <sup>14</sup> Gafu kappay sino nabalurangku, nantatuyagino annalakkino kaodduwan sino kakkolatamira ki Afu Jesus, e ammeran mattalaw, nu ammera lud nandadaggatta mangibanyag sino sapiti Dios.

<sup>15</sup> Gakkurubbaya aneren mangibanyag mappeafu ki Kristo gafu sino imalda sikwak, udde ana kappay korwanira a nalawarino gakkadda.

<sup>16</sup> Mangibanyera gafu sino agganganda sikwak, se ammura si ino gafuneno nabalurangku, se piniliraki Dios a mangita'dag sino kakuruwan-neno nalawara damag. <sup>17</sup> Udde ino umimallira sikwak, tanakwanino gakkadda a mangibanyag, se anggandaka lambawan, e ino dinandanda, dadagganandeno kadidyakku sito abbaluran. <sup>18</sup> Udde kadde, nu antuweno akwanda. Se masiki nu nalawad onnu narakkattino gakkadda, ma'lullang nu ibanyaddeno mappeafu ki Kristo, maanggammak kappay.

<sup>19</sup> Bakkampelang yan, maanggammak kepena, se ammuk si amminira yawa makwa sikwak, nalawanneno tupa'nga sikwak\* gafu sino kararaddaw andino duffunnenno Espirituwi Jesu Kristo. <sup>20</sup> Ino innanamangku andino aanggangkungke, awan nadda keatallangku ki Dios, nu ammena lud madadaggananino turigguwa mangibanyag sino sapiti Dios ingkein a kunna

---

\* **1:19** 1:19 Adwa kappayino anggamma sapitanna yaw sino dami'na Griego: 1) ...ino kelawanangkuweno tupa'nga; 2) ...ino kesalakangkuweno tupa'nga.

kappay si'in ta medayona i Kristo gafu sikwak, massiki nu aggabiyayak kepay onnu natayakunna. <sup>21</sup> Se nu ikkanak, awana korwana gakkagguwa mabiyag, nu bakkampelang ta madayawi Kristo, udde nu matayak, tawwarena sinoy, se ana'nga sikwana. <sup>22</sup> Udde nu mabiyayak kepay, damaka ituluyino tarabafuk e oddu kappayino maduffunan. Antu gafuna, nu ikkana'ngaddino mamili, ammek ammu nu sanneno nalawara pilingku, <sup>23</sup> se gakkuruwa kungkulandeno nakangku. Anggangkunna a matay ta magyana'nga ki Kristo, se tawwarenino kunnenoy. <sup>24</sup> Udde gafu sikwayu, nalawad nu mabiyayak kepay. <sup>25</sup> Awana dudwak si maawaddak, antuweno ammuk si ammek kepay matay, nu ammek lud mabiyag ta duffunantakayu takesi mattuyaggino angnguruddaw anna madadaggananino langga'daw. <sup>26</sup> Anggangku kappaya muli sitan takesi nanu makkaititetam, antuweno mappatuyag sino addayoyu ki Kristo Jesus gafu sikwak.

<sup>27</sup> Udde massiki sanneno makwa sikwak sitaw, mekunna naddino aggangwayu sino nalawara damag mapeafu ki Kristo, takesi nu umantakayuwa itan onnu maddamappelang mapeafu sikwayu, maammuwangku nad si mapatatakayu si nakam anna maddadaruf-fungkayuwa mita'dag sino nalawara damaga kuruwantam. <sup>28</sup> Ammekayu nad mattalaw sino makkontarera sikwayu, se nu ammekayu mattalaw, antuweno pangammuwani Dios sikwara si makastiguwerana si makkikiyad. E antu kappayino pangammuwanna sikwayu si

mesalakangkayu. <sup>29</sup> Se inalla'dakayuwi Dios ta manguruggayu ki Kristo, udde bakkampelang inay, nu ammerakayu kappelud inallak ta mady-atangkayu gafu sino annguruddaw sikwana. <sup>30</sup> Ino dyata lawumandaw, kunna kappayino dyakuwa initayu si'in, e antu kappayino ding-gaggandawa makwa sikwak sito ingkein.

## 2

### *Ino Nad Aggangwa I Kristoweno Tuntulantam*

<sup>1</sup> Ammuyu si nattuyaggino nakandaw gafu sino nesapatandaw ki Kristo e maanggangkayungke gafu sino agganggamma sikwayu. Ana sikwayuweno Espirituwi Dios a manuffun, e damayuwa makkaaallak. <sup>2</sup> Gafu se gakkurug ammin inay, pittatandonaddino nakandaw anna gakkaddaw ta tuntulandaw amminino agganggammi Kristo sikwayu takesi maanggammakungke. <sup>3</sup> Ino gakkaddawa mangwa si massiki sanna, bakkan naddino pallawaranino baggiyungkepay annino ke-dayawandaw, nu ammekayu lud tagatulutuluk, se ibilandawino bulundawira si napatig amma sikwayu. <sup>4</sup> Dandammandopenaddino pallawaranino kasittoleyu, bakkampelangino pallawarandaw.

<sup>5</sup> Tuntulandonaddino nakammi Kristo Jesus. <sup>6</sup> Se massiki wara sikwaneno gakkuruwingke a kinadosi Dios, ammena nattalaginara medayawino kinadosna, <sup>7</sup> nu ammena lud inamay e nabbali si tolay. E sin nabbaliyanna si tolay, nekunnenno kaitanna sino kaitanino bafulunnera

a tolay. Nebilangnga kappayino baggina si aripan. <sup>8</sup> Sino katolena, tagatulutuluka manuntul sino gakkaddi Dios a pakwa sikwana, massiki antuweno katayanna. Ka'atal anna kattalatalawino nepatena, se nelansara sino krus. <sup>9</sup> Antu gafuna, neyantawi Dios e na'danna si kinaturena a awana kakunnana, <sup>10</sup> takesi antuweno medayaw. Ammina ana sey langit anna sito lubag, massiki ino natayira andino ammera maita, mamaliturirana ammina a maddayaw sikwana. <sup>11</sup> Amminira, sapitanda si i Jesu Kristoweno Afafuna ammin, e antuweno kedayawani Dios a Ama.

*Ino Manguruwira, Kunnangke Sirwat Sito Lubag*

<sup>12</sup> Kunnantu, antuyawino sapitangku sikwayuwa kakkolakkuwa iiddukangku. Nu kunnenaya minangkuruwi Kristo, akwantammag-gappay. Sin naganangku sikwayu, kanayundaka kinurug, udde sito awanak sikwayu, kumaral naddino angnguruddaw sito sapitangku. Iyataldonaddi Dios ta mattalokayuwa malliwat, nu ammeyu lud itulutuluya mangwa sino panggammanna takesi meyakkuruwino gakkanna a maangwa sikwayuwa antuweno kesalakandaw. <sup>13</sup> Se i Diosino mangifuyut sino nakandaw ta anggandawa mangwa sino panggammanna e a'dandakayu kappay si panakadamayuwa mangwa.

<sup>14</sup> Sino ammina akwandaw, ammekayu nadda madadumul anna makisosombat, <sup>15</sup> takesi awana kabalawandawa abbingi Dios

e passinggad nalawarino aggangwayu. Se massiki makiagyangkayu sino minalliwatira sito lubagga nabbakabakkannino dinandanda, awaningke nadda pakabalawandaw takesi meampariggayu si bituna massirwat si gafi, <sup>16</sup> anna ipakaammuyu sikwareno sapiti Dios a manga'da si biyaya manayun. Se nu antuweno akwandaw, maanggammakungke gafu sikwayu naso awa puliyani Kristo, se mepaita si ana tupa'ngeno nayangnganku. <sup>17</sup> Aneno iyampariggu sikwayu. Nu wara iwa'latino tolaira ki Dios, ana kappayino isibudda a medagga sino iwa'la'da. Ino annguruddaw, antuweno iwa'la'daw ki Dios. Ino biyaggu, antuweno meamparig sino mesibuwa medagga sino annguruddaw, se massiki nu papatayandak, maanggammak kepay se madadaggananino annguruddaw, e makiaanggammak sikwayu. <sup>18</sup> Kunna kappaya makiaanggangkayu nad sikwak, massiki nu matayak.

### *Da Timoteo Anni Epafrodito*

<sup>19</sup> Nu panggammani Afu Jesus, innanamanku si ammena mabayag e dundunankuwi Timoteo sikwayu takesi nanu muli, antuneno mappalampaw sino nakanku gafu sino ipakaammuna mappeafu sikwayu. <sup>20</sup> Awana korwan si bulungkuwa mikalow sikwayu nu bakkampelangi Timoteo. <sup>21</sup> Se ino korwanira sitaw, antu pelang aggadandammandeno pallawarandangkepay a bakkannino panggammani Jesu Kristo.



<sup>22</sup> Udde i Timoteo, ammuyu si nalawarino aggangwana, se initayu si kummingke a matama se nakitarabafu sikwaka mibanyag sino nalawara damag. <sup>23</sup> Innanamangku mantu si antuneno malana dundunangku sikwayu nu maammuwangkuweno makwa sikwak sitaw. <sup>24</sup> Udde innanamangku kappay si ammena mabayag e makaanggak kappay sitan gafu sino duffuni Afu Jesus.

<sup>25</sup> Dinandangku si pulingku nad sitani Epafrodito a kolattam. Dinundundaw sitawa niyang sino duffundaw sikwak, e nalawarino nepanuffunna sikwak, se nebumbulun sikwaka mangita'dag sino nalawara damag. <sup>26</sup> Paapitangku sitan se maanap sikwayu ammin anna maddararan sin nangammuwanna si nadingngaddawino nalowanna. <sup>27</sup> Gakkuruwa nalowan e nammaggi natay, udde inallakki Dios. Bakkanna antu pelangino inalla'nga, nu ammena lud mampay sikwak, se nu natenad, nadagganan naddino loneno nakangku. <sup>28</sup> Antu gafuna, anggangkungke a pulin sitan ta maanggangkayu nu itandokappay anna takesi mallampawino nakangku. <sup>29</sup> Nanu dumatang sikwayu, pagamwangandonad si nalawad ta ipaitayu si maanggangkayu sino puliyanna, se gakkuruwa kolattam ki Kristo. Nalawad nu iyataltamino tolaya kunnenay. <sup>30</sup> Se i Epafrodito, nammaggi natay gafu sino nangwanna sino nepakwa i Kristo sikwana, e nepustaneno biyangnga a nanuffun sikwak a kunna naddino akwandaw nu warakayu sitaw.

### 3

#### *Ino Kinagaddangnga Maggabwat Sino Anggurug Ki Kristo*

<sup>1</sup> Ino tata kappaya sapitangku sikwayuwa kakkolak, maanggangkayungke nad gafu sino nesapatandaw ki Afu Jesu Kristo. Ammek matappagga ipipidweno sinapikku sikwayu, se inayira, pallawarandaw e ammena makungkulino angnguruddaw. <sup>2</sup> Palanandonaddino tolayira a mangwa si narakkatta iyampariggu si sumarona atu. Ipatu'da si nu ammekayu makugit, ammekayu mesalakan. <sup>3</sup> Udde ino kakuruwana, ikkanetamino ibilangi Dios si gakkuruwa tolena a bakkannira, se ikkanetam, maddayawetam ki Dios gafu sino pannakadameno Espirituna. Maanggammetangkappay gafu sino nesapatantam ki Kristo Jesus, e antuweno talakkantam a bakkannino akkakugit andino korwana aggangwa a kunnino tolayira si tuntulantammad.

<sup>4</sup> Nu wara tolay si damana a manalak si kunenaya aggangwa, awana korwan nu bakkannak. Massiki nu wara massapit si ino katotolena onnu ino inangwaneno talakkannera si antuweno kesalakanna, damak kepaya lambawan. <sup>5</sup> Se sin neyanakak, nakugitak sin mekawaluwa awku, se neyanakaka Judyu a gakagaka i Benjamin a abbingi Israel. Gakku-ruwakungke a Hebreo, se Hebreoweno mapparanakuwera, e Hebreo kappayino damikku annino gagangek. Nu mappeafu kappay sino lintiya neya'da i Dios ki Moises, sinuntulkungke ammina lintig, se Fariseowak. <sup>6</sup> Nappelalotino

angngikalok sinaya lintimmi kiyad si napady-atanguweno manguruwira ki Jesus. Antu gafuna, nu mappeafu sino lintiyi Moises, awangingke pakabalawangku. <sup>7</sup> Udde gafu ki Kristo, amminirenaya dinandangkuwa pallawarangku si'in, ibilangku si awana ketupakkanda to ingkein. <sup>8</sup> E bakkampelang inay, nu ammekira lud ibilang ammin si awana ketupakkanda nu ikunnak sino kinalawanneno pannakaammuk ki Kristo Jesus a Afuk, se antuweno kapatian si ammin. Gafu sikwana, sinalekkurangku ammin e ibilangkuwera si amaka metakkub kesi maammuwanguwi Kristo <sup>9</sup> e mesapatak sikwana. Kunnantu, ino kinagaddangku ingkein, bakkanna gafu sino nanuntulangku sino lintig, nu bakkan lurino kinagaddangnga neya'da i Dios gafu sino angnguruggu pelang ki Kristo. <sup>10</sup> Awana korwan si gakkaggu nu bakkannino pangammuwanguki ki Kristo. Anggangkuwa lawumannino pannakadama a ana sikwana gafu sino nangngangoliyanna, udde bakkampelang inay, nu ammek kappelud anggama lawumannino dya'na, e mesapatak sikwana sino natayanna. <sup>11</sup> Kunnenayino anggangku se innanamangku si mesapata'nga sino pangngangoliyanna.

### *Ino Panuntulantam Sino Panggammani Dios*

<sup>12</sup> Ammek sapitan si inangwakun ammin inay e ammek kappay sapitan si awana nakkuranganguki. Udde akwangku amminino damak takesi meyakkuruwino gakkaddi Kristo sin nepabbalinak si tolana. <sup>13</sup> Kakkolak,

gakkurug si ammek kepay inangwa ammin inay, udde ino akwangku to ingkein, ammekun dandammannino inangangwak si'in, nu ammek lud pittatanino nakangku sino panggammani Dios a akwangkuna sino maddagguna aw. <sup>14</sup> Akwangku ammينا damak takesi madatangkuweno meyamparig si pakkiyanino palayawan takesi appangkuweno labuta iya'dana i Dios sino ammينا inayanna a mesapat sikwana sey langit gafu ki Kristo Jesus.

<sup>15</sup> Kunna nad inayino dandammantam ammina natuyaggino angngurungnga. Udde nu wara sikwayuwa tangananino annandamma, i Diosneno mangipakaammu sikwara sino kakuruwan. <sup>16</sup> Udde massiki kunnanenoy, ino maawag si akwantam ammin, mattalaginaretammadda manuntul sino kiyara nepakaammuwi Dios sikwatam.

<sup>17</sup> Kakkolak, pittatandonaddino nakandaw ammin sino panuntulandaw sikwak. Itandokap-penaddino manuntulira sino aggangwa a nepaitami sikwayu takesi ira kappayino tuntulandaw a bakkannino korwanira. <sup>18</sup> Se odduwera a kumontara ki Kristo, e pappoporayandeno natayanna sino krus gafu sino narakkatta aggangwara. Namipidya a sinapikkuwenay sikwayu si'in, udde sitoya, itangatangikkuna sapitangkappay sikwayu. <sup>19</sup> Se ino ketupakkanino biyadda, makastiguwerana si makkikiyad. Se ino panggammanino baggireno pabbalinda si diosda, anna ino keatallanda nad, antuweno passangele'da, se ino pelang ana sito lubaggino aggadandammanda. <sup>20</sup> Udde sikwatam, sey lan-

gitino gakkuruwa lubbuntam, e antu kappeneno paggabwatanino aggataronantama i Afu Jesu Kristo a mangisalak sikwatam. <sup>21</sup> Pataliyannana yawa kakallakka baggitam ta mekunnera sino kinalawanneno baggina kiyad sin nangngan-goliyanna. Damanera akwan yaw gafu sino pannakadamana a mangaffut si ammin ta map-peturayira sikwana.

## 4

### *Ino Tulduwi Pablo Sikwara*

<sup>1</sup> Kunnantu, ikkayuwa kakkolak, mattalaginnaggayu nad sino angnguruddaw ki Afu Jesus. Iiddukantakayu anna anaanappantakayungke, se maanggammakungke gafu sikwayu se ikkayuweno kunnangke labukku sino tarabafuk.

<sup>2</sup> Ikkayu, Evodias anni Sintike, ikiggimalakku sikwayu ta makkinnawatangkayu, se kunnangke makkolakkayu gafu sino angnguruddaw ki Afu Jesus. <sup>3</sup> Ikka kappaya matalakka bulungku, duffunannuwera nad yana bafabbay, se nalappattira a nakitarabafu sikwak sin nangibanyangu sino nalawara damag, mampay sikwara Clemente andino korwanira a nanufun sikwak. Ammuk si neturak amminino angandera sino leburuwa niturakkani Dios sino anganino maa'danira si biyaya manmayun.

<sup>4</sup> Kanayungkayu nadda maanggam gafu sino nesapatandaw ki Afu Jesu Kristo. Ipidwak kappaya massapit si maanggangayu nad. <sup>5</sup> Paitayu naddino kanakandaw si ammina tolai, se ara'niyennino puliyani Afu Jesus. <sup>6</sup> Ammekayu

nad maddararan, massiki sanneno makwa sikwayu, nu ammekayu lud makkararag ki Dios ta arangngandawino awandaw anna mappasalamakkayu kappay sikwana. <sup>7</sup> Se nu kunnenoyino akwandaw, a'dandakayuwi Dios si nasiyanakka nakamma amme dama a attalanino tolayira, e maimutino nakandaw gafu sino nesapatandaw ki Kristo Jesus.

<sup>8</sup> Kakkolak, antuyawino kauddiyana sapitangku sikwayu. Aggadandammandonaddino gakkurug, ino meyatal, ino naggaddang, ino nadosan, ino kaanggam, annino nadayaw. Massiki sanna a nalawad onnu kedayawan, antu naddino aggadandammandaw. <sup>9</sup> Ammina naammuwandaw sino tulduk, ino dinginggaddaw sikwak andino initayuwa aggangwak, ira kappenaddino tuntulandaw. E i Dios a mappasiyanak sino nakandaw, antuweno mamumbulun sikwayu.

### *Ino Nappasalamatani Pablo Sino Duffunino Filiposira*

<sup>10</sup> Maanggamakungke e mappasalamatak ki Afu Jesus gafu sino ginamwanga duffundaw sikwak. Nabayag ma'lura ammerak dinuffunan, udde amruk si ino gafuna, bakkanna gafu se kinalyawandak, nu ammena lud gafu sino awana wayayuwa mangipaita sino angngikaloyu sikwak. <sup>11</sup> Ammek sinapit yan gafu se nakafutanak sino maawaggu, se nawamaka maanggam massiki sanneno ana sikwak. <sup>12</sup> Napurebakunnino makafutan, kunna kappayino masosobran. Sitoya, nawamaka maanggam massiki sanneno makwa sikwak, nu

mabisinak onnu mabattuwak, nu makkurangak sino maawaggu onnu masobranak. <sup>13</sup> Damaka attamman ammina makwa sikwak gafu sino nesapatangku ki Kristo a mamatuyag sikwak.

<sup>14</sup> Massiki tan nu kunnenoy, nalawarino inangwayu se dinuffunandak sino kadidyakku. <sup>15</sup> Ikkayuwa Filipos, inammuyuwa sin pit-tenin nibanyangku sino nalawara damag sin inanawangku sitan Macedonia, awana korwana nanuffun sikwak nu bakkangkayuwa mangurug sitan. <sup>16</sup> Massiki sin agyanangku sey Tesalonica, bakkampelanga namitta ke ino nappaappandaw si neduffundaw sikwak. <sup>17</sup> Udde bakkannino duffundaw sikwakino kabatangku, nu ammek lud kabbatan si madadaggananino labuta iya'da i Dios sikwayu gafu sinay. <sup>18</sup> Sitoya, gafu sino napaappayu ki Epafrodito, ammekuna makafutan, nu ammek lud masobran sino awangku. Iyawa neya'dayu, bakkanna ikkanappelangino nanga'dandaw, nu ammena lud meamparig si iwa'la'daw ki Dios a mappaanggam sikwana, se aangammangkeno inangwayu. <sup>19</sup> I Dios a passerbiyangku, awana kakunnaneno kinaba' nangnga, e iya'dana sikwayuweno ammina maawaddaw gafu sino nesapatandaw ki Kristo Jesus. <sup>20</sup> Madandayonaddi Dios a Amatam si makkikiyad. Amen.

### *Ino Ambu'nenno Turak*

<sup>21</sup> Sapitandaw sino amminira a tolayi Dios sitan a mangurug ki Kristo Jesus si aggadandammangkuwera. Ino kakkolattama bafu- lungku sitaw, aggadandammandakayu kappe-

pay. <sup>22</sup> Amminino tolayira i Dios sitaw, kumarallino mattarabafuwera sino balayino Emperador, aggadandammandakayu pay.

<sup>23</sup> Allakkandakayu nad ammini Afu Jesu Kristo.



**Ga'dang**  
**Ga'dang: Ga'dang New Testament**

copyright © 2001 Wycliffe Bible Translators, Inc.

Language: Ga'dang

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
d27dc212-1a55-5d51-8f9d-54742e300a0f